



新編歷代名臣芳躅卷之下

當湖啓宸金汝諧纂

弟履台金汝達校

恬退類

列子

子列子窮容貌有饑色客有言於鄭子陽者曰子列子禦寇盖有道之士也居君之國而窮君無乃爲不好士乎子陽令官遺之粟數十乘子列子出見使者再拜而辭使者去子列子入其妻望而拊心曰聞爲有道者妻子皆得佚樂今妻子皆有饑色矣君過而遺先生先生



又辭豈非命也哉子列子笑而謂之曰君非自知我者也以人之言而知我以人之言而遺我粟也其罪我也又將以人之言此吾所以不受也且受人之養不死其難不義也死其難是死無道之人豈義哉其後民果作難殺子陽子列子之見微除不義遠矣

### 曾子

曾子衣敝衣以耕魯君使人往致邑焉曰請以此修衣曾子不受反復往又不受使者曰先生非求於人人則獻之奚爲不受曾子曰臣聞之受人者畏人予人者驕人縱君有賜不我驕也我能勿畏乎終不受孔子聞之曰參之言足以全其節也

### 君平

嚴遵字君平隱居不仕嘗賣卜于成都市日得百錢以自給卜訖卽閉肆下簾以著書爲事楊雄少從之游屢稱其德王鳳請交不許蜀有富人羅冲者問曰君何以不仕君平曰無以自發冲爲君平具輿馬衣糧君平曰我有餘而子不足奈何以不足奉有餘冲曰我有萬金子無擔石何謂有餘君平曰不然吾嘗宿于家見子晝夜汲汲無有足時今我以下爲業不下牀而日得百錢塵埃厚寸不知所用此非我有餘而子不足耶冲大慙君



平歎曰益我貨者損我神榮我名者殺我身故不仕也  
時人服之年九十餘以其業終

### 裘萬頃

裘萬頃字元量不樂仕進以衆薦召爲司直在朝賦詩  
云新築書堂壁未乾馬蹄催我上長安見時只道爲官  
好老去方知行路難千里關山千里念一番風雨一番  
寒何如靜坐茅簷下翠竹蒼梧仔細看

### 羅文毅

國朝羅文毅公倫罷修撰家居貧甚或衣之衣行遇乞  
人死于途輒解以覆之有客晨至畱且飯妻語其子曰  
餅粟罄矣之鄰舍貸之及舉火日已近午亦曠然不以  
爲意

### 楊守陳

楊文懿公守陳以洗馬乞假覲省行次一驛其丞不知  
其爲何官公與之坐而抗禮卒然問曰公職洗馬日洗  
幾馬公漫應曰勤則多洗懶則少洗無定數也俄而報  
一御史且至丞乃促令讓上舍處之公曰此固宜然待  
其至而讓未晚也比御史至則公門人也蹠而起居丞  
乃覲御史不見蒲伏階下百狀乞憐公卒亦不較歸則  
讀書田間不輕謁官府時陸司寇卒有御史過而不吊



也公欲警之於其來謁令閹人辭曰適聞吊陸尚書先  
至彼以候以故失迂御史旋復詣陸先令其子主事君  
至彼辭曰家大人遲公良久不至乃歸其人頗慚公偉  
才高第藻詞淵學藝林推爲雄長而介潔自持未嘗干  
求恩澤爲翰林五品者十有六年而不調權倖有欲引  
之者使所親諭意公語所知曰吾猶嫠婦也茹荼積久  
乃以白首改節耶濡遲散秩竟以三品終

劉大夏

劉忠宣公大夏成弘間多碩人粹然皜然足稱古純臣  
者公是已公生而岐嶷穎敏楊文定一見目爲國器髫  
年從父憲副公任父按部歸履新靴公疑出時無是卽  
以請父示爲餘廩易者乃釋門者手一銀釧遺公公引  
付父所善大叅某所詰其從來跡維時識趣若此介其  
性成耶甫弱冠發解臺司檄有司佐贐公念里中阻饑  
固辭謝焉已成進士選讀中秘懇願外補習民事執政  
嘉之旣授諫垣以親在辭乃受兵部主事已爲職方郎  
時警報旁午調發戰守諸巨務尚書余子悉倚公畫才  
望輝著時權璫用事適兵侍缺欲援之超補尚書亦喜  
得公助已數趣之造謁且擬助之贄公固辭謂福薄不  
敢承久之以資擬晉回卿公又以志在親民爲言乃出



叅閩藩其恬於進也如此泰陵初立庭臣奉詔薦公陞  
督撫嗣祇以常調轉廣東右轄已轉浙江左轄敝歷藩  
司凡九年始以河患晉副都御史踰三年晉戶侍理餉  
雲中還卽三疏乞休已乃起嶺南大制帥踰年召爲大  
司馬無何泰陵升遐武宗嗣政在權璫遂乞骸歸歸三  
年而劉瑾之難作先是理河事竣餘工費二千金瀕行  
藩臬舉爲公贖公令籍之府帑被逮經汴二司擬以遺  
瑾公曰此寧能飫彼意第舉殘骸畀之耳繫詔獄將甘  
心焉同難者謀行賄紆禍子姓丐貸四方知舊擬醜金  
公曰如此而死拚一身耳如此免死則累一生且累子  
孫矣賴屠中丞得減死戍肅州行時故人贈遺悉謝絕  
止受同年李文正一羊裘至肅無資諸司憚瑾毋敢館  
穀三學生徒輪食之有總戎某公所舉者遺百金曰患  
難中非復在位時公曰不聞語云及其老也戒之在得  
乎叅將其遣使致餽勅其使不受亡返公曰吾老惟一  
僕日食不過數錢若受此僕竊之逃不將隻身陷此耶  
尋同戍鍾尚書橐貲果爲僕竊而逃人服公先識云公  
自髫至老卽患難顛沛中介節不渝若此公嘗曰居官  
以正已爲先所謂正已不特戒利亦當遠名不虛耶公  
自戶侍予告歸構草堂於先壟之次讀書其中作東山



賦以見志平生不爲人通私書請託藩臬守令徃造者  
不謁謝薄田僅足供衣食里鄰或肆侵奪任弗與爭嘗  
有李某併其世產族人走書告公公署其尾曰昔詹尚  
書家亦有是詹報家人詩曰四鄰侵我我從伊畢竟須  
思未有時試上含光殿基望秋風秋草正離離我雖不  
及古人望爾輩弗爲詹氏子孫也公言財貨惟務農服  
賈兄力得者獲用其餘易致之物終非已有子孫視之  
亦不慎惜况官貨悖人者乎後起大司馬歸仍居草堂  
再著東山後賦戴笠乘驢徃來山水間于始祖坐次作  
敦本堂歲舉二祭祭畢有燕以合族人爲家規誦于燕  
所訓之族人貧不能存死不能葬長而不能嫁娶者皆  
有賙值歲稔族阻饑鬻玉帶買穀賑之常欲效范文正  
置義田以無貲未就公居鄉忍讓敦睦類若此惟公轄  
廣東時常乘小艇訪白沙白沙問其學曰予存心之功  
十九致知之功十一公之建樹良有本哉又聞公語陸  
吉士曰仕途不可廣交受人知只如朋友若三數人得  
力者自可了一生惟公朝著之交如李文正張簡肅戴  
恭簡山林之交如陳白沙李大涯輩真可了一生耶吳  
司空廷舉云憂民如有病對客若無官公之謂也李文  
正謂公與物無忤臨事有爲林司寇俊稱公清約如知



白先憂如希文公望如彥國能處大事如子明確評哉

### 章懋

章文懿公懋公任翰林時朝廷舉張燈故事命下詞臣詠詩公率同官莊景黃仲昭援蘇長公疏意直諫忤旨左遷尋陞僉事年未及艾卽力辭官歸力田自給四方學者雲從家貧刈蔬脫粟而餉之或諷爲文章曰弗暇或請著述曰儒先之言至矣盡矣刪其繁蕪可也弘治中薦起爲南監祭酒以母喪力辭詔增設司業廳以居終制赴官世廟初進南禮部尚書致仕公嘗謂門人董遵曰待客之禮當存古意今人多以酒食相尚非也聞

薛文清公居家畱客止用以雞黍盛以瓦器酒三行就飯而罷又魏文靖公居家客至必畱飯止一肉一菜雖不之公府必回訪舟次有所相遺必答禮不虛受人惠此二公可法云

太宰漁石唐公致政家居時出入惟徒步有陳大叅良謨者說之曰翁官居八座年邁七旬故天下大老也孔

子曰吾從大夫之後不可徒行翁學孔子者而顧欲過之耶公曰固然第吾楓山先師致政歸祇是步行未嘗

乘轎迺姪朴菴公

名極侍郎

及竹澗潘公

希曾侍郎

俱守此禮吾

安敢違耶吁浙有楓山殆猶魯有岱嶽其遺矩所畱諸



公皆率履弗越如此

### 吳琳

吳冢宰公琳父應澍富好行德與吳草廬魯子輩輩諸名賢友善元朝徵詔不起書西山先生褒之至今稱西山先生公業儒通經術高祖平陳歲用詹同薦召爲國子博士嗣遷浙江按察司僉事歷貳鹺臺著績入爲起居注吳元年命同魏觀求遺賢於四方陞太常卿進兵部尚書京闈鄉試上曰琳經學優命與司業宋濂典試事洪武三年改吏部尚書賜誥褒美公旣入吏部與詹同迭視事尋公以老乞致仕旣家居上嘗遣使察之使者潛至公旁舍見一農人坐小几拔秧布田貌甚端使者問曰此有吳尚書者家何在其人尚在否公歛手對曰琳是也使還白狀上益重之復召入爲原官後在吏部堂上座上一旦暝而逝

### 張繼孟

張少叅公字子醇公以禮部儀制司郎中陞山東布政司叅議年未五十致政歸居林下家徒四壁立居旁建茅屋三楹鑿池爲橋植竹數竿扁爲一笑亭日觴咏其中禁足不出客至第肅至陞送亦不出門卽朝貴枉訪止折柬相答于勢利紛華泊如也嘗言作人須要有趣



對俗客喀然無一語遇學士大人有道術者與之譚說  
名理楊權風雅疊疊不倦令人灑然不能遽別前輩一  
時如西涯相公蒲汀尚書皆海內宿望常聯輿過訪公  
或畱坐所共脫粟之飯間出蔬果杯酒三五巡卽止諸  
老凡自公第出輒喜見眉宇相謂曰吾修遇張子醇一  
飯勝倍別家盛筵矣其爲人愛重如此楊方伯守魯旣  
第筮仕揚州府推官瀕行候謁請教公謂曰只要做得  
人好不論做官做得人好時充軍也得爲民也得夫當  
後生筮仕初卽爲此厲語不爲忌諱楊公亦終身佩之  
不嗔爲不吉語古道如此年八十卒卒之日至無以爲  
殮其子以計聞於諸同年在京宦者得贈若干金始克  
襄事云

### 黃卷

黃憲副公卷初官比部出補山西僉憲晉陝西少叅已  
晉憲副卽解紱歸歸年才四十又五耳公歸蓋卽真明  
農云春夏間家衆悉驅之田作而獨與其配操杵曰炊  
釜作飯食躬荷而饁之嘗假農具鄰舍鄰舍子欲昇送  
之公曰毋此何時也假我具卽德厚矣柰何又妨汝務  
遂自肩之如田焉公性故孤介悃樸而逸興甚豪雅嬰  
情山水間域中山嶠水涘靡不遊至或乘敝輿或策欵



段或曳杖躡蹻條然咏嘯飄飄若仙焉家去城邑四十里而近經歲不一至至則市童撫掌歡呼相指曰黃公來也蓋識其輿敝漏云公居常好客客至座已徐起臨庖服犢鼻衣治具具無兼味治畢乃盥手更衣出卽新媼上客率以爲常余一日借元孚周進士候公公歡甚縱談名理因及疆場時事奮然有請纓之志移日不輟已有婢從屏間稟曰烹雞熟矣請割公曰少需蓋劇談方適無間也有頃婢稟如初公又曰少需如是者三而公談益劇乃命婢曰汝姑自割旣其饌出裁助狼藉不爲意也公間起入室余從之闢其室一榻蕭然不啻僧舍已余時若冷然噓以清風洒然沃以瓊漿也退謂光孚曰吾與子今幸游羲皇世矣相與嗟嘆不置云



純孝類

文王

周文王王季子也爲世子時朝于王季日三雞初鳴而衣服至于寢門外問于內豎曰今日安否何如內豎曰安文王乃喜及日中又至亦如之及暮又至亦如之其或不安則色憂行不能正履王季復膳然後亦復初食上必親視寒煖之節食下必問所膳而後退

考叔

穎考叔鄭國人也爲穎谷封人初鄭莊公以叔段之故寘其母姜氏于城穎而誓之曰不及黃泉無相見也旣



而悔之考叔聞之有獻於公公賜之食舍肉公問之對曰小人有母皆嘗小人之食矣未嘗君之美請以遺之公曰爾有母遺緊我獨無考叔曰敢問何謂也公語之故且告之悔對曰公何患焉若闕地及泉隧而相見其誰曰不然公從之公入而賦大隧之中其樂也融融姜出而賦大隧之外其樂也洩洩遂爲母子如初君子曰穎考叔純孝也愛其母施及莊公詩云孝子不匱永錫爾類其是之謂乎

### 丘吾

孔子行遊中路聞哭者聲其音甚悲孔子曰驅之驅之前有異人音少進見之丘吾子也擁鑣帶索而哭孔子辟車而下問曰夫子非有喪也何哭之悲也丘吾子對曰吾有三失孔子曰願聞三失丘吾子曰吾少好學問周遍天下還後吾親亡一失也事君奢驕諫不遂志二失也厚交友而後絕三失也樹欲靜乎風不定子欲養乎親不待往而不來者年也不可再見者親也請從此辭則自刎而死孔子曰弟子記之此足以爲戒也於是弟子歸養親者十三人

### 閔損

孔門閔損字子騫以德行稱早喪母父娶後母生二子



名曰孝經 卷之一  
損惟孝心不怠母終嫉損冬月以綿絮衣自生子以蘆  
花絮衣損損安受之一日父令損御車體寒失靴父察  
知之欲遣後母損涕泣而告父曰母在一子寒母去三  
子單父善其言乃止母亦感悔遂成慈母

子春

樂正子春下堂而傷其足數月不出猶有憂色門弟子  
曰夫子之足瘳矣數月不出猶有憂色何也子春曰善  
如爾之問也吾聞諸曾子曾子聞諸夫子曰天之所生  
地之所養無人爲大父母全而生之子全而歸之可謂  
孝矣不虧其體不辱其身可謂全矣故君子頃步而不  
敢忘孝也今予忘孝之道予是以有憂色也一舉足而  
不敢忘父母是故道而不徑舟而不游不敢以先父母  
之遺體行殆一出言而不敢忘父母是故惡言不出於  
口忿言不反於身不辱其身不羞其親可謂孝矣

毛義

後漢毛義家世以孝行稱張奉慕其名而候之坐定而  
府檄適至以義爲邑令義奉檄而入喜動顏色奉心賤  
之及義母死去官守服後舉賢良公車徵不至奉歎曰  
賢者固不可測往日之喜乃爲親屈也帝下詔褒之

董永



董永千乘人少失母獨養父父亡無以葬乃從人貸錢一萬永謂錢主曰後若無錢還君當以身作奴主甚憫之永得錢葬父畢將往爲奴於路逢一婦人求爲永妻永曰今貧若是身復爲奴何敢屈夫人爲妻婦人曰願爲君婦不恥貧賤永遂將婦人至錢主曰本言一人今乃有二主問永妻何能妻曰能織耳主曰爲我織絹三百匹卽放爾於是索絲一月之內三百匹絹足主驚遂放夫婦二人而去行至舊相逢處乃謂永曰我天之織女感君至孝天使我爲君償債君事了不得久停語訖雲霧四垂騰空而去

### 長孫慮

長孫慮代人也其父真與母飲酒間誤以杖擊母致死縣囚真處以重罪慮上書云父母忿爭本無餘惡直以謬誤致茲禍畧今母喪未殯父命旦夕慮兄弟五人並幼有一女弟向始四歲更相鞠養不能保全父若就刑交墜溝壑乞以身代父命使嬰弱衆孤得蒙存立尚書奏慮於父爲孝子於弟爲仁兄尋情究狀殊可矜憫後魏孝文帝特赦其父死罪流之

### 王褒

晉王褒字偉元城陽人父儀仕魏爲司馬屬元帥司馬



昭帳下關東之敗昭問曰近日之事誰任其咎儀對曰責在元帥昭怒殺之褒痛父死於非命乃隱居不仕號慟終日後昭子炎篡魏滅吳而有天下國號曰晉三徵七辟皆不就教授生徒塾席未嘗西向而坐示不臣於晉也及葬父畢廬於墓側晨昏攀栢悲號涕淚著樹樹爲之枯母性畏雷每遇風雨趨立母側預防雷震遽以手掌掩母之耳及母沒復廬墓傍凡遇雷急趨墓下拜曰褒在此伴母母幸無怖與諸生說詩至哀哀父母生我劬勞未嘗不三復流涕門人爲廢蓼莪之篇

### 劉殷

劉殷字長盛新興人也七歲喪父哀毀過禮曾祖母王氏盛冬思董而不言食不飽者一旬矣殷怪而問之王言其故殷年九歲乃於澤中慟哭曰殷罪釁深重幼丁艱罰王母在堂無旬月之養殷爲人子而所思無獲皇天后土願垂哀愍聲不絕者半日於是忽若有人云止殷止聲收淚視地有董生焉因得斛餘而歸又嘗夢人謂西籬下有粟寤而掘之得粟十五鍾銘曰七年粟百石以賜孝子劉殷自是食之七歲方盡晉太傅楊駿表其行於朝勅有司供其衣食蠲其徭賦賜帛二百疋穀五百斛惠帝永寧初拜新興太守



卞眡

卞眡濟陰人晉成帝咸和三年蘇峻稱兵犯關眡父壺  
爲尚書令加領軍將軍與峻連戰死之眡及弟盱見父  
沒相隨赴賊同時見害眡母裴氏撫二子屍哭曰父爲  
忠臣汝爲孝子夫何恨乎徵仕翟湯聞之歎曰父死於  
君子死於父忠孝之道萃于一門峻乎贈眡散騎侍郎  
盱奉車都尉

潘綜

潘綜吳興人孫恩之亂攻破村邑綜與父驃共走避賊  
驃年老困乏坐地語綜曰我不能去汝走可脫幸勿俱

死綜迎賊叩頭曰父年老乞賜生命驃亦請曰兒年少  
自能走今爲我不去我不惜死乞活此兒賊因斫驃綜  
抱父於腹下賊斫綜頭面凡四鎗綜已悶絕有一賊從  
旁來語其衆曰此兒以死救父何可殺之殺孝子不祥  
賊乃止父子並得免宋文帝元嘉四年有司奏改其里  
爲純孝里蠲租布三世

陳遺

吳郡陳遺性至孝母好食釜底焦飯遺作郡主簿恒裝  
一囊每煮食輒貯錄焦飯歸以遺母後值孫恩賊衆攻  
沒郡縣袁府君卽日便征遺已聚斂得數斗焦飯未展



歸家遂帶以從軍戰於滬瀆敗軍人潰散逃走山澤皆多饑死遺獨以焦飯得活時人以爲純孝之報也

### 孝克

徐孝克東海鄒人也事母陳氏至孝梁末侯景寇亂孝克養母餽粥不能繼崎嶇乞食以充給人陳宣帝嘉其操行以爲國子祭酒每侍宴無所食至罷則其前膳羞減損帝密使中書舍人管斌伺之知其常取珍羞異果納紳帶中歸以遺母帝嗟歎良久乃勅自今宴享孝克前饌並遣將還餉母時論美之後爲散騎侍陳亡客長安家徒壁立母病欲粳米爲粥不能常得母亡後孝克遂常噉麥有遺粳米者孝克悲泣終身不食焉

### 吉粉

梁吉粉字彥霄馮翊人父爲原鄉令爲吏所誣逮詣廷尉粉年十五號泣衢路祈援於公卿見者流涕至京擗登聞鼓乞代父命武帝異之以其童幼疑受教於人勅廷尉蔡法度嚴究取其款實法度乃盛陳刑具厲色問曰爾求代父死勅已許矣便應伏法審能死否且爾幼稚智不及此必爲人所教果是誰乎若有悔意亦當聽許對曰囚雖蒙弱豈不畏死顧諸弟咸幼不忍見父極刑願代父死斷自曾臆柰何受人教乎法度以聞詔並



省之

彥光

北朝梁彥光字修之幼時天性至孝父梁顯久負篤疾醫治不效忽遇海上方士視其脉曰此病已入膏肓須得紫石英爲餌乃可愈彥光遍求於藥客俱無之乃憂瘁不知所爲次晨往後園剪韭爲方士饌屋旁有樹垂於園左群鳥爭巢墜下一物彥光怪而持歸方士視之卽紫石英也細研調藥一服卽愈鄉衆咸異之晉武帝時累遷大夫

狄仁傑

唐狄仁傑字懷英太原人授并州法曹叅軍親在河陽仁傑登太行山見白雲孤飛謂左右曰吾親舍在其下悵望久之雲移乃去後居母喪有白鵲馴擾之異武后時拜鸞臺侍郎復同鳳閣鸞臺平章事時后黜中宗爲廬陵王居房州欲以武三思爲後仁傑每以母子天性爲言力諫后感悟迎中宗復爲太子反周爲唐社稷之功也

任敬臣

任敬臣字希古濟南人五歲喪母哀毀備至七歲問父英曰若何可以報母英曰揚名顯親可也乃刻志從學



名臣考蹟 卷之一  
舉孝廉授著作局正字父亡慟哭數殞絕繼母曰爾不勝喪幾至滅性可謂孝乎敬仁乃強進饘粥服除遷秘書郎後官至弘文館學士

### 歐陽修

歐陽修字永叔吉州人也宋仁宗時爲南京畱守母沒奉喪歸葬吉之永豐瀧岡將興役忽陰雨彌月修念襄事愆期日夕憂懼里之老父告之曰鄉有沙山之神乃吾郡太守也廟祝於此里人遇水旱禱之必應盍以告焉修乃爲文齋潔而謁之翌日天雨開霽始克舉事人皆以爲孝感所致也

### 徐積

徐積字仲車楚州山陽人孝行出於天稟三歲父死旦旦求之甚哀使讀孝經輒淚落不能止事母至孝朝夕冠帶定省從胡瑗學所居一室寒一衲裘啜粟飲水瑗饋以食弗受應舉入都不忍捨其親徒載而西登進士第舉首許安國率同年入拜且致百金爲壽謝而却之以父名石終身不用石器行遇石則避而不踐或問之積曰吾遇之則怵然傷吾心思吾親故不能加足其上爾母亡水漿不入口者七日悲慟嘔血廬墓三年臥苦枕塊衰經不去體雪夜伏墓側哭不絕音翰林學士呂



名臣考略 卷之十一  
漆過其墓適聞之爲泣下曰使鬼神有知亦垂涕也甘露歲降兆域杏兩枝合榦旣終喪不徹筵几起居饋獻如平生州以行聞詔賜粟帛宋仁宗皇祐初近臣合言積之賢乃授揚州司戶叅軍

### 王薦

王薦福寧人性孝而好義父嘗病甚薦夜禱於天願減已年益父壽父絕而復甦告其友曰適有神人黃衣紅帕首恍惚語我曰汝子孝上帝命錫汝十二齡疾遽愈後果十二年而卒母沈氏病渴語薦曰得瓜以啖我渴可止時冬月求於鄉不得行至深奧嶺值雪薦避雪樹下思母病仰天而哭忽見巖石間青蔓離披有一瓜焉因摘歸奉母母食之渴頓止

### 黃贊

黃贊字止敬臨江人父均道元仁宗延祐間求官京師留贊江南時贊年幼及長聞父娶妾居永平乃往省之則父沒已三年矣庶母聞贊來盡挾其貲去更嫁拒不見贊贊號哭語人曰吾來省父也不幸父歿思奉骨歸葬莫知其墓苟得見庶母示以墓所死不恨矣尚忍利遺財耶久之聞庶母居海濱亟裹糧往見庶母復拒之三日不納庶母之弟憐之與偕至永平屬縣樂亭求父



名臣考蹟 卷之十一  
墓又弗得贊日夜悲哭禱于神一夕夢老父以杖指墓處曰見片磚即可得明日就其地求之庶母之弟曰真是已歛時有某物可驗啓朽棺得父骨以歸

### 石明山

石明山與母居餘姚山中樵薪以給炊爨人稱其孝一日自外歸覓母不見視其壁壞而臥內有三虎子知母爲虎所害乃盡殺虎子礪巨斧立壁後伺母虎至斫之腦裂而死復持斧往倚巖傍伺候俄有牡虎至遂并斫殺之明山亦立死其傍不仆張目如生而手中所執斧力不可拔

### 謝庭滄

謝少卿公諱庭滄爲諸生時入省父母先滌面漱口然後入趨北堂希鞞鞠臚勤問起居及成進三仕爲令一清如水徵授吏科給事中諫畱幸承天駕犯震怒庭杖謫典史最後量移至僉事遂飄然歸後以叅政太僕少卿起俱力辭事母從兄極孝恭敦篤鄉誼無貴賤老少皆若同胞一體每徒步入城市以爲常偶值負薪者爭前薪據公腋捫而辟之不發一醮讓語渡河舟子使酒箠楚蒼頭公不惟不校且趨辟泥途間袴襦盡汚次早舟子肉袒悔罪公笑謝使去一日搜圖帙中得祖父負



同邑董推官債目其借與者俱久下世矣公是夜不安枕次卽驚基地得價倍償之董之子孫駭而不受公固彊之受乃已斯公正氣盛德所以足垂不朽也

### 金汝礪

金公汝礪爲孝庶時封翁虹洲偶得危症公藥必親嘗溺必躬掖夜不解帶者數月嘗默禱于神願以身代恍惚見神人謂云爾父能還遺金曾活人命有陰德且感汝精誠願爲添壽至翼日乃瘳公生平言有坊表動遵繩尺心事如光天皎日丰度如春風秋月以太夫人慈悲戒殺公臨民笞朴不用而民自嚮化多方聚順鄉黨

### 咸稱其孝云

### 曹端

曹端字正夫河南澠池人潜心理學日事著述教人務躬行實踐事父母曲盡孝養年荒勸賑一方賴以全活在霍學年久士子服習教化郡人薰炙唯禮義是尚學者稱爲月川先生



友于類

季子

吳王壽夢有四子長曰謁次日餘祭次日夷昧次日季札季札最賢三兄皆知之於是王壽夢薨謁以位讓季子季子終不肯當謁乃爲約曰季子賢使國及季子則吳可以興乃兄弟相繼飲食必祝曰使我早死令國及季子謁死餘祭立餘祭死夷昧立夷昧死次及季子季子時使行不在庶兄僚曰我亦兄也乃自立爲吳王季子使還復事如故謁子光曰以吾父之意則國當歸季子以繼嗣之法則我適也當代之君僚何爲也於是乃



使專諸刺僚殺之以位讓季子季子曰爾殺吾君吾受爾國則吾與爾爲共篡也爾殺吾兄吾又殺汝則是昆弟父子相殺無已時也卒去之延陵終身不入吳君子以其不殺爲仁以其不取國爲義

### 許武

許武漢光武建武中會稽太守第五倫舉爲孝廉武以二弟晏普皆未顯欲令成名乃請之曰禮有分異之義家有別居之道於是共割財產以爲三分武自取肥田廣宅奴婢强者二弟所得並悉劣少鄉人皆稱弟克讓而鄙武貪婪晏等以此並得選舉武乃會宗親泣曰吾爲兄不肖盜聲竊位二弟年長未豫榮祿所以求得分財自取人譏今理產所增三倍于前悉推于二弟一無所留於是郡中翕然稱之

### 姜肱

漢姜肱字伯淮兄弟四人以孝友著聞幼同居共被而臥及各娶妻不入房室嘗與弟仲海李江同詣郡夜遇盜劫欲殺之肱泣曰弟幼未娶父母所憐願自殺身以全弟季江復泣曰兄年在前家之珍寶乞自受戮以代兄盜自遂兩釋焉桓帝聞其孝友命工圖像徵之不赴



孔融

漢張儉以黨事捕急亡抵孔融兄褒不遇融合之事泄儉脫走併收褒融融曰保納莊舍者融也當坐褒曰彼來求我非弟之故吏問其母曰家事任長妾當其辜一門爭死不能決卒坐褒

薛包

薛包性至孝弟子求分財異居包不能止乃中分其財奴婢引其老者曰與我共事久若不能使也田廬取其荒頓者曰吾少時所理意所戀也器物取朽敗者曰我素所服食身口所安也弟子數破其產輒復振給安帝

時特徵拜侍中

庾袞

庾袞字叔褒少履勤儉篤學好問事親以孝稱晉武帝咸寧中大疫二兄俱亡次兄毘復殆癘氣方熾父母諸弟皆出次于外袞獨留不去諸父兄強之乃曰袞性不畏病遂親自扶持晝夜不眠其間復撫柩哀臨不輟如此十有餘旬疫勢既歇家人乃反毗病得差袞亦無恙父老咸曰異哉此子守人所不能守行人所不能行歲寒然後知松栢之後凋始知疫癘之不相染也母終服喪居于墓側察孝廉舉秀才皆不就



王覽

晉太保王祥繼母朱氏不慈其少弟覽朱氏所出年數歲見祥被楚撻輒涕泣抱持至于成童每諫其母少止虐朱屢以非理使祥覽輒與祥俱又虐使祥妻覽妻亦趨而共之朱患之而止祥喪父之後漸有時譽朱尤疾之密使醜祥覽知之徑起取酒朱遽奪反之自後朱賜祥食覽輒先嘗朱懼覽致斃遂止覽孝友恭恪名亞于祥仕至光祿大夫

鄧攸

晉右僕射鄧攸永嘉末沒于石勒過泗水攸以牛馬負妻子而逃又遇賊掠其牛馬步走擔其兒及其弟子綏度不能兩全乃謂其妻曰吾弟早亡唯有一息理不可絕止應自棄我兒耳幸而得存我後當有子妻泣而從之乃棄其子而去卒以無嗣時人義而哀之爲之語曰天道無知使鄧伯道無兒弟子綏服攸喪三年

劉靈哲

劉靈哲字文明齊高帝建元元年位齊郡太守前軍將軍嫡母崔氏及兄子景煥泰始中爲魏所獲爲布衣不聽樂及父懷珍卒當襲爵靈哲固辭以兄子在魏存亡未測無容越當茅土朝廷義之靈哲傾產贖母及景煥



各目考略 卷之十  
累年不能得武帝哀之令北使者請之魏人送以還南  
襲封懷珍爵靈哲位兗州刺史隆昌元年卒

楊椿

楊椿字延壽常戒子孫曰吾兄弟若在家必同盤而食  
若有近行不至必待其還亦有過中不食忍饑相待吾  
兄弟八人今存者有三是故不忍別食也又願畢吾兄  
弟不異居異財汝等眼見非爲虛假如聞汝等兄弟時  
有別齋獨食者此又不如吾等一世也魏孝文時授官  
與曹少卿加給事中爲豫州刺史

岑文本

岑文本昭文本之弟也文昭當太宗時任校書郎多交輕  
薄帝不悅謂文本曰卿弟多過朕將出之文本曰臣少  
孤母所鍾念者弟也不欲離左右今若外出母必憂無  
此弟是無老母也泣下嗚咽帝愍其意召文昭讓勅卒  
無過

李勣

李勣字茂功太守時封英公性友愛其姊病嘗自爲煮  
粥而火燎其鬚姊戒止答曰姊多疾而勣且老雖欲數  
爲煮粥其可得乎

陽城



陽城字亢宗世爲官族天資好學貧不能得書求爲吏  
隸集賢院竊院書讀之晝夜不出戶六年無所不通及  
進士第乃去隱中條山與弟堦域常易衣出年長不肯  
娶謂弟曰吾與若孤惻相育旣娶則間外姓雖共處而  
益疏吾不忍弟義之亦不娶德宗時遷國子司業出爲  
道州刺史

范純仁

范純仁字堯夫仲淹之子也仁宗皇祐初進士第爲著  
作郎時兄純祐有心疾純仁奉之如父藥膳居服皆躬  
親時節之賈昌朝守北都請參幕府以兄辭宋庠薦試  
之任豈易得何庸如是卒不就

張存

張存字誠之性孝友仕宋嘗爲蜀郡得繒綺文錦以歸  
悉布之堂上恣兄弟擇取常曰兄弟手足也妻妾外舍  
人耳柰何先外人而後手足乎收恤宗屬嫁聘窮嫠不  
使一人失所仁宗時歷京東陝西河北轉運使

扈鐸

扈鐸汴梁人幼育于伯父及壯事伯父如所生伯父老  
無子鐸爲買妾歲餘產一女其妻睡熟壓女死久之伯



父卒遺腹生一男鐸懲前失告其母及妻妹護視之已復廬戶外中夜伺察不敢安寢弟能食常自抱哺與同臥起十年不少怠嘗有疾鐸夜稽顙北辰哀禱曰天不佑余家鐸父子間可去一人勿喪吾弟使伯父無後也且而弟愈

朱原虛

朱原虛江州人父母俱喪二弟在髫年原虛撫育無怠其妻私匿所遺綾錦十餘篋勸夫分析原虛弗納二弟知嫂有間言逕遷于外居一日鄰人降紫姑仙原虛請教仙降筆曰何處西風夜捲霜鴈行申斷各悲傷吳綾越錦成私篋不及姜家布被香原虛悟迎二弟還家與之完娶取妻所匿綾錦悉以均分教之儒業後二弟俱登科第事兄如父







